

八旗通志初集卷之一百四十九

名臣列傳九

正黃旗滿洲世職大臣四

圖海

八旗通志
卷一百四十一

圖海滿洲正黃旗人。姓馬佳氏。世居綏分地方。父名穆哈達。圖海天資忠慤。具文武才。初事

世祖章皇帝。爲內國史院侍讀。順治八年。陞內秘書院學士。遇九年

恩詔。授拜他喇布勒哈番世職。十年。晉內弘文院大學士。充議政大臣。十二年二月。以恪勤職業。股肱贊襄。加太子太保。旋以刑部事關係重大。

命管理刑部尙書事。十四年。緣事罷。十八年正月。世祖上賓。遺命圖海宜任以重地。

聖祖仁皇帝嗣位。卽於是年十月。補圖海正黃旗滿洲

都統康熙二年奉

命爲定西將軍。同靖西將軍穆里瑪率禁旅會川湖之師。征流寇餘孽郝搖旗。劉汝魁。李來亨等。至湖廣。有賊兵三千餘。夜犯總兵官俞奮起營。親率官兵分路截殺。敗之。賊又犯總督李國英營。遣副都統赫葉擊敗之。又有二千餘賊。犯提督鄭蛟麟營。遣署護軍統領瓦岱等擊敗之。賊又犯署護軍統領根特巴圖魯。夸蘭。大沙津。達禮薩。賴。總兵官于大海等營。遣署護軍統領哈克山等。分兵援剿。俱敗之。旣而郝搖旗。劉汝魁等相

繼破滅。惟李來亨擁衆茅麓山。最爲險峻。圖海
因與穆里瑪率兵晝夜環攻。盡誘其餘寇殺之。
三年八月。李來亨闔門縊死。自焚其巢。得其山
寨。誘執僞新樂王。及僞將軍一員。總兵官三員。
副將二員。推官一員。賊兵六十一人。盡殺之。得
僞銀印一。又招降僞公侯二。將軍一。總兵以下
僞官五百八十餘員。兵八千八百餘人。家口三
千餘衆而還。六年二月。陞補內弘文院大學士。
加世職爲一等阿達哈哈番。七年十二月。以南
懷仁稱吳明烜儀象差錯。與大臣等同往測驗。

八年七月。以亢旱。奉

命。同內大臣伯費揚古等。會同刑部。將擬定重犯覆審。酌量減等。九月。自以兼任都統事繁。奏言。臣以一身而膺二任。才愧兼長。且非國家文武分途之制。乞解機務。專力戎行。得

旨慰留。十二年十二月。奸民楊起隆。詐稱朱三太子。謀聚衆爲亂。正黃旗下周公直家人陳益與焉。公直呈首其事。言現有不識面之兇徒數十人。在其家。卽領官兵圍其宅。悉擒之。是年冬。吳三桂反。十三年。耿精忠繼叛。南方用兵。軍需浩繁。

特命以大學士兼理戶部尚書事。十四年三月。因上疏言。近來供應大兵。恐有派累民間。雖屢奉

聖諭禁止。有司未能實心奉行。應勅督撫嚴禁。一應軍需。不得私派。夫役不得先期拘禁。徵收錢糧。正項外。不得絲毫科歛。民間詞訟。除重情速審。速結外。其餘戶婚細事。不得濫准。牽累無辜。並禁衙蠹作奸。指公需索。土豪惡棍。魚肉善良。庶幾安居樂業。民不知兵。

聖祖是之。命速行通飭。是時察哈爾布爾尼乘吳逆作亂。劫其父阿布柰。與兵造反。從嫁郡主長史辛

柱等赴

京奏聞。

聖祖命多羅信郡王鄂札爲撫遠大將軍。以圖海爲副將軍。率師往討。四月癸巳啓行。己酉次岐爾哈泰。聞賊屯達祿。因率輕騎前進。次日直抵其地。布爾尼設伏山谷。率兵三千拒敵。圖海同多羅信郡王等。議將八旗滿洲蒙古烏喇盛京土默特官兵。過山谷勦殺。挨次前進。忽賊兵一隊二百餘騎。從山溝突出迎戰。撓亂我土默特兵。圖海卽令護軍統領哈克山。副都統吳丹洪世祿。

委署前鋒統領達克沙哈等分頭進擊。親督陣指揮。並後至賊四百擊敗之。布爾尼復率兵三千排齊馬鎗軍器拒敵。圖海同信郡王議將八旗滿洲蒙古烏喇盛京官兵排列整齊。復領護軍統領哈克山等分頭進擊。仍親行督陣。擊敗之。布爾尼復聚敗兵千餘。合伊馬鎗兵拒敵。同信郡王親督八旗官兵分頭進擊敗之。布爾尼合伊潰散兵二百餘人。哨聚岡上拒敵。仍親督官兵進擊敗之。大獲馬鎗盔甲兵器。又招撫察哈爾民一千三百餘戶。布爾尼兄弟僅以三十

騎遁去。其弟炊扎布等亦皆散走。辛亥。聞郡主留居瓦子府東三十里。遣官迎歸。捷聞。得

旨嘉獎。下部議叙。由一等阿達哈哈番。優給一等阿思哈尼哈番。十五年二月辛酉。

聖祖特諭兵部。大將軍貝勒董額等。屯兵平涼日久。賊寇尙未剿滅。城池尙未恢復。夫秦省不能卽定。川賊尙在窺伺者。皆由王輔臣未剿滅。平涼未克取故也。其以都統大學士圖海爲撫遠大將軍。率每佐領護軍二名。亟赴陝西。總轄全省滿漢大兵。斷賊餉道。剿滅平固逆孽。速靖地方。大將軍抵平涼時。盡收各將

軍敕印遇有分遣酌量給付其貝勒董額以下悉聽大將軍節制三月統領大兵直抵平涼城下大揚兵威壁壘旌旗倍加精彩城中震懾諸將請乘賊衆氣奪卽行攻城圖海謂我奉

天威討此逆豎何患不克但念城中百姓皆

朝廷赤子一旦誤遭逆豎劫持以至於此若卽攻城恐多殺戮賊倘能向化歸誠全此十萬生靈不更美乎城中軍民聞之莫不感激咸思自拔以出賊勢日衰平涼城北有虎山墩地勢最高俯瞰城中如在掌股賊用精兵據守以通西北一

路糧運。圖海親率諸將。周覽城外形勢。因謂此賊咽喉要地。卽率官兵攻之。賊衆萬餘來拒。步前馬後。布列火器挨牌。以死固守。因飭我兵分路進擊。自己訖午。大敗賊衆。斬僞總兵二人。餘賊被傷及墜崖死者甚衆。遂奪其墩。獲馬匹器仗無算。從墩上發大礮擊之。及其營署。城中動靜。無不畢睹。賊衆惶懼無策。又餉道已絕。始登城乞降。捷

聞。下部議叙。六月壬子朔。疏言臣統兵抵平涼。大敗賊於平涼城下。卽遣劄授叅議道周昌入城招撫。

王輔臣。輔臣隨遣其副將乞降。恭俟

恩命。

聖祖命頒赦詔撫慰之。丁巳。圖海接奉

恩詔。復令周昌賁

詔入城。次日。王輔臣遣僞布政使龔榮遇等。率士民詣

軍門。獻軍民冊。又遣其子王繼正。及僞總兵蔡

元等。繳所受吳逆僞敕二紙。僞平遠大將軍印。

陝西東路總兵官將軍印。各一顆。及諸僞劄。因

見王輔臣。尙懷疑懼。甲子。復遣周昌。并親姪前

鋒侍衛保定前往。溫言開諭。丙寅。王輔臣卽親

至大營叩頭謝

恩。遂入城薙髮。率衆來降。隨傳令各營嚴勒隊伍。止令副都統吳丹一人領數騎入城安撫。秋毫無犯。念百姓無辜。身陷賊中。橫遭塗炭。卽飭令地方有司多方賑卹。收掩骸骨。其婦孺避亂在城流離困苦者。各令報明鄉貫。遣親信將士護送。交與地方官安插。毋致失所。遠邇帖然。反側者聞風來歸。固原僞巡撫陳彭慶陽僞總兵官周揚名嘉峪關僞總兵官王好問關山僞副將孔印雄及雲南土司總兵官陸道清等。各率所屬官

兵相繼來降。戊寅。捷疏至。奉

旨。大將軍圖海恭承簡命。秉鉞臨邊。卽宣布恩威。勦撫並用。平涼一帶。旬月綏平。俱見籌畫周詳。布置神速。克副委用。立奏膚功。朕心深爲嘉悅。着從優議叙。有功人員。一併議叙具奏。王輔臣旣感戴國恩。悔罪投誠。着復其原官。加太子太保。擢靖寇將軍。立功贖罪。部下官弁。照銜給劄。兵民酌量安插。七月戊申。疏報秦州。熬門等處。逆賊橫行。臣遣振武將軍佛尼勒提督張勇。王進寶等。統滿漢兵會剿。賊不能支。僞將軍吳之茂。於六月二十六日宵遁。我兵

追勦。敗賊於牡丹園。復敗賊於西和縣北山。斬獲無算。吳之茂僅以十餘騎越山而遁。隨奉

特旨諭吏兵二部云。撫遠大將軍都統大學士圖海。器識老成。才猷練達。贊襄機務。宣力累朝。以文武之長才。兼忠愛之至性。勞績茂著。倚毗良殷。前察哈爾布爾尼。背恩反叛。命圖海爲副將軍。統兵征勦。運籌決勝。克振軍威。未及一月。捷功立奏。逆賊殲滅。疆圉敕寧。近以平涼等處阻兵日久。屢命勦撫。罔有成效。特簡圖海爲大將軍。總督大兵。節制各路。果爾謀畧淵深。調度得宜。軍鋒所至。一戰克捷。更能體朕好生之

心宣布恩威。開誠招撫。遂使平涼慶陽固原等處。文武官員兵民人等。傾心向化。悔罪歸誠。生民免於塗炭。地方得以安全。數日之間。關隴悉皆底定。皆由籌畫周詳。布置神速。勦撫並用。克建膚功。圖海以心。膺大臣膺秉鉞重寄。實心爲國。克副倚任。朕心深爲嘉悅。於軍功議叙外。應從優加恩。以示朕眷注忠勤。酬答勲庸至意。着議政王貝勒大臣會同議奏。尋議覆加封爲三等公。世襲罔替。甲寅復疏報。臣遣將軍穆占等。於六月二十七日。進兵磬門。賊遁去。追勦賊於紅崖等處。恢復禮縣。又慶陽僞總兵